

## ✻ 命令

### 臨時大總統令

國務總理唐紹儀電呈謹擬南京留守條例七條請予核奪本大總統業經認可茲公布之此令

中華民國元年四月十三日即壬子年二月二十六日大總統蓋印

### 南京留守條例

第一條 南京留守直隸大總統有維持整理南方各軍及南京地面之責

第二條 凡南方陸軍水師要塞均歸留守處理隨時通報陸海軍部及參謀部

第三條 南方如有事變不及申請大總統時留守得先調遣軍隊軍艦相機處置隨即申報大總統並通報陸海軍部及參謀部

第四條 關於南京府知事交涉巡警所管事務均歸留守統轄

第五條 南方各軍及南京地方各官廳之人員統由留守會同江蘇都督任免申報大總統

第六條 關於留守管轄範圍內所需款項由留守咨商理財部籌解

第七條 南京留守府俟南方軍隊整理就緒即行裁撤

### 臨時大總統令

任命國祥署理德州城守尉此令

中華民國元年四月十四日即壬子年二月二十七日大總統蓋印

臨時公報

陽歷四月十五日即壬子二月二十八日

# 電報

上海溫交涉司宗堯來電 陽歷四月初十日即壬子二月二十三日

准前司法總長伍廷芳君言山陽縣民政長姚榮澤被控慘殺周實丹阮式一案三月二十三三十一號法廷公審被告律師所憑團體輿論依法律應歸無效原告律師憑証擬定爰書承審官丁榕發問六條陪審員依事實推求答復丁榕宣布擬抵死刑自三月三十一日起三星期內執行特假五分鐘准姚犯發言該犯以此案係受紳團逼迫非出己意哀求輕減陪審員等體察本案發生在光復未定秩序擾亂之際與平靖之時不同該犯罪有應得情尙可原當經共表同情各無異言並由承審官認可得由陪審員稟請大總統恩施輕減並當堂提出如奉恩減該犯應由罰款五千兩以四千兩爲周阮兩家撫卹一千兩公費次日陪審員七人內旋有三人反對卽未便以陪審員全體名義具呈其餘四人向廷芳處討論此案廷芳力主輕減詢之承審官陳貽範丁榕亦均同意惟廷芳現已交卸司法職務不能再發印電應由通商交涉使代達等語謹以奉陳伏乞鑒督爲禱溫宗堯佳

上海胡詒穀等來電 陽歷四月十一日即壬子二月二十四日

袁大總統鈞鑒山陽民政長姚榮澤被控慘殺周實丹阮式一案三月二十三三十一等日公審被告所憑團體輿論依律均歸無效據原證周鴻翥阮寶琪指證由律師擬定爰書承審官發問六條陪審員按事實推求答覆承審官宣布擬批死刑限三星期內執行特假五分鐘准姚犯發言該犯以此案係受紳團逼迫非出惡意哀求議減陪審員等體察此案發生在光復初定秩序擾亂之際與平靖之時不同該犯雖罪有應得實情尙可原經承審官認可陪

陽歷四月十五日 即壬子二月二十八日

審官得代懇大總統恩施寬典除另呈外謹此電陳伏乞矜察准於施刑期內電飭輕減無任盼禱胡詒穀貝仁元虞汝鈞鄔卓暝謹稟

甘肅議會李鏡清來電

陽歷四月十三日 即壬子二月二十二日

甘省議會成立諮議局取銷前議長張林焱等解職甘議會李鏡清等叩魚

# 公函

臨時籌備處致陸軍部函

敬啟者前議請貴部遷移一節業已議定現接上海來電國務員參議員均於二十日以前到京等因奉

大總統諭卽以貴部爲國務員辦公處所希卽迅速遷移可也此頌日祉

中華民國元年四月十三日

郵傳部鐵路總局致京奉路局函

逕啟者京奉行車部分人員較多節經飭令裁汰冗員在案本局長以爲冗員充塞爲害固大至用非所長使賢者無以自見因自棄而下伍凡庸以致天枉人才害爲尤甚如現在各大站正副及學習站長動三四人事務既閒羣居終日以言練習則不足以傳惡習則有餘自宜分定職權令有專司或調歸他站使之以有以自見卽用爲儲才之地庶梗枿杞梓不致入我手而變爲棄材此於路政根本實有關係其餘養路廠務各處亦宜共知此意希卽切實整理並隨時注意爲要專勦並頌日祺

中華民國元年四月初九日



## 呈文

浙江臨時會議議長呈報當選參議員莫永貞辭職應以候補當選人遞補文

案查中央臨時約法第十八條參議員每行省內蒙古西藏各選派五人青海選派一人其選派方法由各地地方自定之又查浙江省約法第二十七條議會議員得代表人民選舉中央參議院議員又約法施行法第三條關於議會第四章議會未召集以前臨時議會適用之各等語並奉總統勅電內開共和國家議會斷無不由民選之理此次選舉參議員應查照參議院咨電一律改用民選現在各省臨時議會次第成立應即以該議會爲選舉機關所有各省應選參議員五人均由該會投票選出俟選齊集會時即與現在參議員辦理交代以重立法希即照辦等因奉此本會遵即開會於四月二號投票選舉計當選者爲陳時夏殷汝驥周珏王家襄莫永貞五人其候補當選者爲王文欽金兆揆王正廷許燊范賢方阮性存余名銓張翅蔡汝霖黃羣十人內莫永貞辭不應選以候補當選人中得票最多數之人王文欽遞補以符額數除電聞並知照各該員迅速到院組織外理合備文呈報爲此呈報

大總統請煩鑒核施行此呈  
中華民國元年四月初四日

臨時公報

陽歷四月十五日即壬子二月二十八日



# 公啟

參議院暫設事務所公啟

現奉 大總統諭南京參議院已議定遷至北京參議員定於本月二十一日以前齊集應暫設事務所豫備料理接待一切事宜等因現已擇定宣武門內象坊橋法律學堂（即前資政院）爲參議院暫設事務所各省參議員到京者請自本月十一日起每日上午十點鐘至下午三點鐘蒞所接洽凡應投參議院文件電報亦望逕投本所爲要  
中華民國元年四月初十日

